

U ovom broju, između ostalog, čitajte:

- **UPFBiH hitno zahtijeva potpisivanje Privremenog socijalnog sporazuma kojim će se zabraniti otpuštanje radnika tokom krize i uvođenje moratorija za otplatu rata kredita**
- **UPFBiH uputilo inicijativu za hitno donošenje mjera za ublažavanje ekonomskih posljedica**
- **UPFBiH: Nadležne institucije BiH da hitno interveniraju u Hrvatskoj i Briselu kako bi se ubrzao robni transport**
- **UPFBiH uputilo inicijativu za izmjenu Odluke o mjerama neposredne kontrole cijena od 16.03.2020. i zahtjev za donošenje privremene mjere za oslobađanje od plaćanja akcize na alkohol koji se koristi za proizvodnju sredstava za dezinfekciju**
- **UPFBiH zahtijeva skraćivanje roka za štampanje evidencijskih markica za brašno i izmjene dvije naredbe koje regulišu međunarodni i domaći promet**
- **Kantonalne grupacije poslodavaca pri UPFBiH predložile mjere za ublažavanje ekonomskih posljedica**





UPFBiH hitno zahtijeva potpisivanje Privremenog socijalnog sporazuma sa Vladom FBiH i Sindikatom kojim će se zabraniti otpuštanje radnika tokom krize

Udruženje poslodavaca Federacije Bosne i Hercegovine zahtijeva od institucija vlasti na svim nivoima da odgovorno i savjesno rade svoj posao, s ciljem očuvanja života i zdravlja građana, radnih mjesta i privrede.

U ovom trenutku potrebno je odlučno i pametno liderstvo i spremnost na hitno djelovanje. Svako onaj u institucijama ko nije spreman donositi pametne, mudre odluke i hitno djelovati treba se odmah povući sa funkcije koju obavlja i ustupiti mjesto onome ko hoće, zna, želi i može raditi, a takvih u ovoj zemlji ima sasvim dovoljno.

Iz UPFBiH poručuju da kontinuirano rade s ciljem pronalaženja rješenja koja će sačuvati živote i zdravlje, radna mjesta i privredne tokove u FBiH. U vezi sa navedenim iz UPFBiH od nadležnih institucija Federacije BiH i kantona zahtijevaju hitno provođenje slijedećih mjera:

1. **Hitno potpisivanje Privremenog socijalnog sporazuma sa Vladom i Sindikatom, kojim će se za vrijeme njegovog trajanja:**

- Zabraniti otpuštanje radnika zbog krize
- Uvesti institut čekanja
- Regulirati godišnje odmore uposlenika
- Regulirati rad od kuće uposlenika
- Smanjiti plaće onima za čijim radom privremeno ne postoji potreba, ali ne manje od minimalne plaće

- Smanjiti plaće u javnom sektoru 20 posto
- Regulirati obaveza poslodavca da isplati plaće u dogovorenom iznosu
- Precizno definirati refundiranje dijela plaće od strane države i sl.

Ukoliko sindikat ne pristane na potpisivanje Privremenog socijalnog sporazuma, u tom slučaju treba donijeti lex specialis kojim se trebaju regulirati ova pitanja.

2. Hitno usvajanje rebalansa budžeta na nivou FBiH, kantona, općina i gradova i sav prihod, osim neophodnog za funkcioniranje sistema, preusmjeriti na sprečavanje širenja zaraze, socijalnu i zdravstvenu sigurnost građana, te očuvanje ekonomije

3. Za sve radnike koji su izgubili posao zbog odluka institucija sistema (zabrana rada, zabrana kretanja, zabrana prevoza i sl.) **refundaciju plaća** obezbjeđuje država na nivou koji je donio takve odluke

4. Pravna i fizička lica, koja to zatraže, **osloboditi plaćanja svih poreza i doprinosa**. Nakon perioda važenja odluke otpisati onaj dio tih potraživanja proporcionalno smanjenju naplate potraživanja, a preostali dio naplatiti u 60 mjesečnih rata, bez kamate

5. Insistirati kod Agencije za bankarstvo i banaka, da napuste autističan pristup i **omoguće moratorij** svima koji to zatraže, u protivnom Federacija i kantoni trebaju otkupiti te kredite i regulirati način njihove otplate, po prestanku krize

6. **Privremeno odgoditi rokove plaćanja direktnih poreza, akontacija poreza i parafiskalnih nameta, ukinuti i smanjiti troškove najma poslovnih prostora u vlasništvu države**

7. **Prekinuti izvršne postupke i postupke prinudne naplate za fizička i pravna lica**

8. **Prestati sa naplaćivanjem komunalnih usluga za fizička i pravna lica**, a po prestanku krize pristupiti rješavanju pitanja nenaplaćenih potraživanja

Iz UPFBiH pozivaju da se u ovim vremenima krize zaborave pojedinačne i partikularne interese, da se pokaže solidarnost i umanje štete krize na pojedince, društvo i ekonomiju.

UPFBiH zahtijeva uvođenje moratorija na otplatu rata kredita svima koji zatraže odgodu plaćanja



Udruženje poslodavaca FBiH poziva Agenciju za bankarstvo FBiH i sve komercijalne banke koje posluju na teritoriji FBiH da konačno shvate težinu situacije u kojoj su se našla fizička i pravna lica zbog pandemije coronavirusa. UPFBiH poziva Agenciju za bankarstvo i FBiH da prestanu sa

kalkulantskim i autističnim ponašanjem te zahtijeva da se moratorij odnosi na sve koji zatraže odgodu plaćanja rate kredita, a ne da banke procjenjuju kome će odobriti odgodu plaćanja kredita, a kome ne.

„U situaciji kada je prioritet sačuvati zdravlje i živote ljudi, radna mjest a i maksimalno umanjiti negativne posljedice pandemije coronavirusa na privredu, Agencija za bankarstvo FBiH i banke se ponašaju autistično i kalkulantstki. UPFBiH apsolutno podržava mjere kojima će se sačuvati stabilnost finansijskog sektora, ali zahtijevamo da banke, bez previše administriranja i papirologije, pomognu privredi da sa što manje posljedica prebrodi negativne uticaje pandemije coronavirusa. U tom smislu, zahtijevamo da Agencija za bankarstvo FBiH donese odluku kojom će svim fizičkim i pravnima licima koja to zatraže biti omogućena odgoda naplate rata kredita čija je kreditna sposobnost pogoršana, odnosno, čiji su izvori za otplatu smanjeni i time onemogućeno ili će biti onemogućeno izmirivanje obaveza prema banci, ukoliko je to posljedica negativnog uticaja izazvanog pandemijom virusnog oboljenja COVID-19", kažu u UPFBiH.

Iz UPFBiH naglašavaju da posljedice pandemije coronavirusa moraju podnijeti svi pa i banke i podsjećaju da stabilnost bankarskog sektora u FBiH i BiH, banke dobrim dijelom duguju domaćim privrednicima.

UPFBiH uputilo inicijativu za hitno donošenje mjera za ublažavanje ekonomskih posljedica izazvanih Covidom-19



Udruženje poslodavaca u FBiH smatra da nadležne institucije u Federaciji Bosne i Hercegovine pored zdravstvenih mjera za sprječavanje i širenje koronavirusa HITNO mora poduzeti i sve aktivnosti u cilju donošenja ekonomskih mjera za sprječavanje posljedica izazvanih koronavirusom na privredu Federacije BiH.

1) Obustaviti pokretanja svih radnji za prinudno ostvarenje potraživanja u skladu sa Zakonom o izvršnom postupku FBiH na period od tri mjeseca odnosno za vrijeme trajanja proglašenja stanja neregulacije

Ova mjera ima za cilj očuvanje radnih mjesta, likvidnosti firmi i sprječavanje negativnih posljedica uzrokovane koronavirusom, jer se u većini kompanija poslovanje u proteklom mjesecu odvijalo u otežanim uslovima, te je, prema informacijama članica, kod većine poslovnih subjekata došlo do gubitka u poslovanju i nemogućnosti naplate potraživanja. Također, mnogi privredni subjekti su zbog izrečene mjere koje se odnose prije svega na zabranu obavljanja djelatnosti i ograničenog kretanja morali zatvoriti

svoje kompanije odnosno obrte.

Zbog svega navedenog Udruženje poslodavaca Federacije Bosne i Hercegovine smatra da je neophodno da nadležne institucije u cilju spašavanja ekonomije HITNO poduzmu mjere za obustavu pokretanja i već pokrenutih radnji za prinudno ostvarenje potraživanja na period od tri mjeseca odnosno dok traje stanje prirodne nesreće.

2) Obustaviti sve radnje u postupcima podnošenja porezних prijava, plaćanje poreza, razrez i naplata poreza, prinudna naplata porezних obaveza prema Zakonu o Poreznoj upravi FBiH na period od tri mjeseca ili prestanka stanja prirodne nesreće.

Udruženje poslodavaca Federacije BiH zahtjeva donošenja akta kojim će se uvesti poreske mjere za vrijeme stanja prirodne nesreće radi ublažavanja ekonomskih posljedica s ciljem da se u situaciji prirodne nesreće poreznim obaveznicima obustave sve radnje vezano za




prijavu i plaćanje poreza i poreznog duga. Poduzimanje ove mjere je od izuzetnog značaja za kompanije kojima je izrečenim mjerama obustavljen rad i koje su bile prinuđene da zatvore kompanije, te je neopravdano očekivati od navedenih kompanija da u vremenu kada im je protivno njihovoj volji zabranjen rad da uredno izvršavaju obaveze koje se tiču porezних zakona.

Privrednici od Vlade FBiH traže kompenziranje sredstava kompanijama za direktne i indirektne poreze kako bi se ublažile posljedice pandemije koronavirusa



Privrednici iz Federacije Bosne i Hercegovine formirali su 13.03.2020. godine Krizni štab koji će aktivno učestvovati u donošenju mjera koje imaju za cilj ublažiti posljedice pandemije korona virusa u svijetu. Krizni štab je zatražio hitan sastanak sa Vladom Federacije BiH na kojemu će biti predstavljeni prijedlozi privrednika, što podrazumijeva da se privrednici aktivno uključe u postojeći Krizni štab FBiH, kao i budući krizni štab koji poslodavci zahtjevaju da se formira na državnom nivou.

„Naš prevashodni cilj jeste sačuvati zdravlje naših usposlenika, a odmah nakon toga radna mjesta. Zato ćemo učiniti sve da bismo spriječili otpuštanje radnika, ali privrednici to ne mogu uraditi sami i tu očekujemo pomoć vlasti. Tražimo da se formira Kompenzacioni fond na nivou FBiH od sredstava budžeta, sredstava Svjetske banke,



MMF itd. Iz Kompenzacionog fonda bi trebala biti osigurana sredstva za uplate kako direktnih, tako i indirektnih poreza. Također, od Vlade FBiH tražimo da stavi moratorij na plaćanje kredita i obaveza prema radnicima od strane kompanija, a da taj dio obaveza preuzme Kompenzacioni fond. Zahtijevamo i da se bankama postavi moratorij za naplatu rata kredita kako kompanijama, tako i radnicima. Od Ministarstva saobraćaja i komunikacija BiH tražimo da kroz redovnu komunikaciju sa nadležnim institucijama drugih država osiguraju neometan robni transport", kazao je predsjednik Udruženja poslodavaca FBiH Adnan Smailbegović.

Privrednici su tražili da posljedice krize izazvane pandemijom koronavirusa podjednako snose kompanije iz javnog i realnog sektora.

„Ono što je neophodno za provedbu ovih prijedloga je proglašavanje vanrednog stanja, jer postoje svi elementi za donošenje takve odluke. Osim što vanredno stanje omogućava provedbu predloženih zaključaka, kompanije bi mogle zaštititi svoje interese u ugovorima, u smislu da ne moraju plaćati penale za neispunjavanje obaveza, upravo zbog vanredne situacije", istaknuo je predsjednik Privredne komore FBiH Mirsad Jašarspahić.

Istaknuto je da kompanije u Bosni i Hercegovini već duži vremenski period osjećaju posljedice pandemije od otkazivanja turističkih aranžmana, problema sa nabavkom robe i repromaterijala, a situacija je kulminirala u posljednjih 15 dana sa eskalacijom pandemije u regionu i Evropi.

„Krizni štabovi moraju funkcionirati, a poslodavci moraju biti sastavni dio Kriznog štaba", kazao je predsjednik Grupacije metalske i elektroindustrije pri PKFBiH Kasim Kotorić.

Krizni štab poslodavaca predložio prvi set hitnih mjere za ublaživanje ekonomskih posljedica krize uzrokovane pandemijom koronavirusa



Krizni štab poslodavaca koji je formiran na inicijativu Udruženja poslodavaca FBiH, a kojeg čine predstavnici UPFBiH i Privredne komore FBiH dostavio je 18.03.2020. prvi prijedlog hitnih mjera vlastima koje imaju za cilj ublažiti posljedice pandemije korona virusa na privredu i radna mjesta. Hitnim mjerama se od

nadležnih institucija na svim nivoima vlasti traži:

1. Formiranje Kompenzacionog fonda iz domaćih i stranih sredstava za refundiranje dijela troškova radnika koji će ostati bez posla
2. Hitno postizanje dogovora između entitetskih vlada, sindikata i poslodavačkih udruženja kojim će se definisati način zajedničkog snošenja troškova cijene rada
3. Hitno donošenje moratorija za pravna i fizička lica za otplatu kredita
4. Smanjenje i odlaganje plaćanja komunalnih usluga za vrijeme trajanja vanrednog stanja
5. Smanjenje i odlaganje troškova plaćanja najma poslovnih prostora i komunalnih taksi od strane organa lokalne zajednice
6. Definisanje parafiskalnih nameta koji će se smanjiti ili ukinuti dok traju vanredne okolnosti
7. Ispitati mogućost smanjenja cijene ili odgađanje plaćanja troškova energije


Krizni štab poslodavaca uputio novi set mjera za ublažavanje ekonomskih posljedica

Krizni štab poslodavaca osnovan na inicijativu Udruženja poslodavaca Federacije Bosne i Hercegovine, a kojeg čine predstavnici Udruženja poslodavaca FBiH i Privredne komore Federacije BiH, dostavio je 26. marta 2020, godine Vladi Federacije BiH novi set



mjera za ublažavanje ekonomskih posljedica pandemije koronavirusa koje se u prvom redu odnose na regulisanje plata, direktnih poreza i doprinosa svih privrednih društava.

1. Izmjenu poreza i doprinosa, te ostalih pratećih nameta koji će se retroaktivno primjeniti od 01. marta 2020. godine na poslovanje privrednih subjekata u privatnom vlasništvu koja su pogođena pandemijom Corona virusa, gdje se predlaže da Vlada Federacije BiH u potpunosti snosi iste dok je na snazi proglašeno stanje nesreće
2. Da se određene odredbe postojećeg Zakona o radu Federacije BiH i Kolektivnog ugovora FBiH za vrijeme trajanja stanja nesreće stave van snage, a da se odlukama Vlade Federacije BiH regulišu odredbe za koje je to potrebno: pitanje preraspodjele radnog vremena, mogućnost upućivanja radnika na prinudni godišnji odmor, umanjeње plaće za vrijeme pandemije dok radnici nisu na radu,



skraćivanje radnog vremena, preraspodjela radnog vremena zakona, itd. Ovim se obezbeđuje prostor za donošenje niza mjera podrške kompanijama pogođenim pandemijom Corona virusa, čime se osigurava da ne dođe do masovnih tužbi

3. Rebalans budžeta – na način da svi troškovi koji se ne odnose na isplatu plata, vanbudžetske fondove, zdravstvenu zaštitu, socijalnu zaštitu i slično prebace na stavke vezane za zdravstveni sektor, bezbjednost, socijalu i ublažavanje posljedica ekonomske krize i očuvanje zapsolenosti.

4. Omogućiti povrat PDV-a za uplate za nenaplaćena potraživanja u mjesecu martu i drugim mjesecima ako postoji potrebna dokumentacija

5. U skladu sa članom 50. Zakona o porezu na dohodak poreznim obaveznicima poreza na dohodak omogućiti ukidanje mjesečne akontacije ili izmjena u toku poreskog perioda

6. Omogućiti u skladu sa članom 26. Zakona o radu rad izvan prostorija poslodavca jednakost u tretiranju radnika kod kuće sa drugim plaćenim radnicima

ESV za teritorij FBiH podržalo prijedlog mjera Vlade FBiH



Ekonomsko-socijalno vijeće za teritorij Federacije BiH je na sjednici održanoj 19. marta 2020. godine podržalo prijedlog mjera Vlade Federacije BiH za stabilizaciju privrede i saniranje posljedica pandemije koronavirusa.

Vladin prijedlog mjera podrazumijeva uspostavu posebnog fonda za stabilizaciju privrede, potom uspostavu garantnog fonda, uvođenje moratorija na otplatu kredita, te uvođenje kreditnih linija za privredu, posebno mala i srednja preduzeća.

Ekonomsko-socijalno vijeće je predložilo Vladi Federacije BiH da prilikom usvajanja mjera uzme u obzir sve prijedloge socijalnih partnera iznesene na današnjoj sjednici.

Ekonomsko-socijalno vijeće za teritorij FBiH je odlučilo formirati Radnu grupu u kojoj će biti po dva predstavnika svakog socijalnog partnera. Zadatak ovog tijela bit će praćenje provođenja mjera i situacije uzrokovane pojavom i širenjem koronavirusa.

UPFBiH: Mjere Vlade FBiH ohrabrujuće, ali nedovoljne




Iz Udruženja poslodavaca Federacije Bosne i Hercegovine smatraju da su predložene mjere Vlade Federacije BiH za stabilizaciju privrede i saniranje posljedica pandemije koronavirusa neuporedivo bolje od ranijeg prijedloga i da su ohrabrujuće, ali nedovoljne.

S ciljem zaštite života i zdravlja zaposlenih i očuvanja radnih mjesta, iz UPFBiH pozivaju Vladu FBiH i Savez samostalnih sindikata BiH na potpisivanje privremenog Socijalnog sporazuma kojim će se omogućiti slanje ljudi na čekanje i osigurati isplata plaća na način da svi snose dio tereta, srazmjerno snazi - radnici najmanje, poslodavci više, a vlade najviše.

„Insistiramo da se hitno preusmjere sva budžetska sredstva, osim onih namijenjenih za plaće uposlenih, vanbudžetske fondove, zdravstvenu zaštitu, PIO/MIO, socijalnu zaštitu i slično, za umanjivanje efekata krize izazvane pandemijom koronavirusa“, naglašavaju iz UPFBiH.


Iz UPFBiH podsjećaju da je u većini država koje se bore sa posljedicama krize izazvane



pandemijom koronavirusa, donesena upravo ovakva odluka, kojom se sva budžetska sredstva, osim onih namjenskih za svrhe koje ističe i UPFBiH, preusmjeravaju na očuvanje radnih mjesta i pomoć privredi.

„U UPFBiH predložene mjere smatramo samo početkom djelovanja u pravcu stabilizacije privrede i saniranja posljedica pandemije koronavirusa, jer će se mjere morati mijenjati i usklađivati sa daljim razvojem situacije u BiH, okruženju i svijetu. Podržavamo selektivnost u primjeni mjera, uz uslov da kompanije koje se nalaze u stanju ekonomske ugroženosti ne mogu računati na pomoć ukoliko otpuštaju radnike“, naglašavaju iz UPFBiH.

Kao nedostatak u predloženim mjerama Vlade FBiH, iz UPFBiH ističu činjenicu da se donesenim mjerama ne uzima u obzir pogoršanje situacije na terenu koje je izvjesno, niti dužina trajanja krize. Naglašavaju da se sa svojim setom mjera koje će pomoći privredi moraju uključiti i niži nivoi vlasti, uzimajući u obzir podjelu nadležnosti kada je u pitanju privreda.



„Insistiramo da se hitno stavi u funkciju Koordinacioni odbor za stabilizaciju privrede i saniranje posljedica pandemije koronavirusa, koji mora što prije početi operativno djelovati. Također tražimo da se hitno definiraju procedure i primjenjuju mjere koje je donijela Vlada FBiH“, kažu iz UPFBiH.

UPFBiH uputilo zahtjev za donošenje privremene mjere za oslobađanje od plaćanja akcize na alkohol koji se koristi za proizvodnju sredstava za dezinfekciju i održavanje higijene

Udruženje poslodavaca FBiH je Vijeću ministara BiH, Upravi za indirektno oporezivanje BiH i Koordinacijskom tijelu BiH za zaštitu i spašavanje uputilo zahtjev za **hitno donošenje privremene mjere za oslobađanje od plaćanja akcize na alkohol (ethanola) koji pravna lica koriste kao repromaterijal u proizvodnji sredstava za dezinfekciju, čišćenje i pranje.**



Bh. proizvođači su u periodu vanredne situacije izazvane Covidom-19 uložili sve raspoložive resurse i snagu kako bi proizveli dovoljno sredstava za dezinfekciju kojim snabdjevaju sve javne ustanove, trgovine i stanovništvo. Obzirom da nisu u mogućnosti obezbijediti dovoljne količine etil alkohola koji je neophodan u procesu proizvodnje, bh. proizvođači su primorani vršiti uvoz istog od dobavljača izvan BiH, te su potpuno ovisni o ino tržištu.

Predložena mjera je zdravstvena i doprinijet će cjelokupnoj društvenoj zajednici i pomoći u borbi protiv širenja zaraze na području Bosne i Hercegovine, te će se obezbijediti dovoljne količine alkohola za proizvodnju sredstava za dezinfekciju i čišćenje.

UPFBiH zahtjeva skraćivanje roka za štampanje evidencijskih markica za brašno



Udruženje poslodavaca FBiH je Upravi za indirektno oporezivanje UIO, Vijeću ministara BiH i Koordinacionom tijelu za zaštitu i spašavanje BiH uputilo **zahtjev za hitno obezbjeđivanje štampanja markica za**

evidentiranje brašna i skraćivanje roka za štampanje istih.

Naime, prema Pravilniku o posebnim uslovima evidentiranja obilježavanja brašna koje se stavlja na tržište obaveznik je dužan Upravi podnijeti zahtjev za izdavanje markica najkasnije 30 dana prije isporuke markica.

Pojava korona virusa i proglašenje stanje nesreće dovela je do značajnog povećanja potražnje brašna, a moguće je i da će zbog problema u međunarodnom transportu i velike potražnje u narednom periodu doći do velike nestašice brašna na tržištu.

S ciljem obezbjeđenja rezervi brašna usljed povećane potražnje veliki broj članica Udruženja je napravilo značajne narudžbe brašna iz mlinova za proizvodnju iz Srbije i uvezle prve šlepere brašna. Za prve zalihe kompanije su imale već spremne određene količine evidencijskih markica za brašno, međutim zbog trenutne situacije prirodne nesreće, kod većine kompanija uvoznika došlo je do nedostatka evidencinih markica.

Prema saznanjima članica Udruženja, nove serije evidencionih markica štampat će se tek za 30 do 45 dana.

Udruženje smatra da je navedeni rok neopravdan, te da u stanju prirodne nesreće ovaj rok mora biti smanjen. Ukoliko se HITNO ne pristupi štampanju evidencionih markica za brašno i ukoliko markice u što kraćem roku ne bude dostupne kompanijama doći će do zastoja uvoza brašna.


UPFBiH traži izmjene dvije naredbe koje regulišu međunarodni i domaći promet

Udruženje poslodavaca Federacije Bosne i Hercegovine uputilo je Federalnom štabu civilne zaštite i Koordinacijskom odboru za stabilizaciju privrede i saniranje posljedica pandemije Covida-19 zahtjev za izmjene Naredbe o zdravstvenom nadzoru i izolaciji za vozača vozila u



međunarodnom transportu i Naredbe - Procedure zdravstvenog nadzora svih putnika u međunarodnom prometu.

Udruženje poslodavaca Federacije Bosne i Hercegovine je mišljenja da naredbe trebaju biti HITNO izmijenjene i to na način da se omogući da vozači, kojima je naložena izolacija, mogu vršiti prijevoz roba i na teritoriji Bosne i Hercegovine uz poštovanje svih zahtjeva



samoizolacije koje važe i za međunarodni transport.

Prema informacijama koje je Udruženje dobilo od članica, vozačima kojima je određena mjera izolacije, prema stavu gradskih, kantonalnih i federalnih kriznih štabova kao i tumačenjima pojedinih sanitarnih inspektora, za vrijeme izolacije naredna vožnja dozvoljena je samo za prijevoz roba u međunarodnom transportu, odnosno zabranjen im je prijevoz roba unutar granica Bosne i Hercegovine. Dakle, naredni prevoz roba vozač može obavljati samo u međunarodnom transportu.

Donošenjem ovakvih mjera privredni subjekti izloženi su velikim problemima u nedostatku vozača. Tako npr. kompanije koje se bave prevozom sve svoje vozače usmjeravaju na međunarodni prevoz, a onda imaju problema kod prevoza unutar granica Bosne i Hercegovine, jer vozače koji su došli izvan BiH i koji su u izolaciji ne mogu koristiti za prevoz unutar BiH.

Udruženje je mišljenja da je u interesu cjelokupne društve zajednici da se za vrijeme krize izazvane pandemijom koronavirusom, obezbijedi da zemlja bude opskrbljena potrebnom robom, poput hrane, lijekova i sredstava za higijenu. U tom smislu, nesporna je činjenica da profesionalni vozači bili u domaćem ili međunarodnom transportu, imaju značajnu ulogu u obezbjeđivanju roba za cijelo stanovništvo.

Inicijativu možete pogledati [OVDJE](#).

**UPFBiH uputilo inicijativu za izmjenu Odluke o
mjerama neposredne kontrole cijena od
16.03.2020.**



Udruženje poslodavaca FBiH uputilo je Ministarstvu trgovine FBiH i Koordinacijom odboru za stabilizaciju privrede i saniranje posljedica pandemije koronavirusu inicijativu za izmjenu Odluke o mjerama neposredne kontrole cijena od 16.03.2020 godine u kojem se traži da se hitno poduzmu sve aktivnosti za izmjenu Odluke, a kako je predloženo od strane Udruženja.

U inicijativi se navodi da Odluka o mjerama neposredne kontrole cijena od 16.3.2020. godine prema kojoj Vlada Federacije BiH kao mjeru neposredne kontrole cijena na području Federacije BiH propisuje „zamrzavanje cijena na 05.03.2020.godine“ je odluka koja će dovesti do štetnih posljedica i nestašice proizvoda.

Naime, Udruženje poslodavaca u Federaciji BiH je svakako protiv divljanja cijena u vrijeme nesreće izazvane pandemijom koronavirus. Međutim, uvažavajući kompleksnost lanca snabdijevanja: proizvođač – distributer – veleprodaja – maloprodaja nije moguće u praksi u potpunosti provesti ovu Odluku. Prema Odluci Vlade zabrana se svodi na veleprodaju i maloprodaju koje su posljednje u lancu snabdijevanja. Postavlja se pitanje šta je u situacijama kada cijene mijenjaju proizvođači (npr. piletina – vrlo je otežana nabavka hrane za piliće, povećale su se cijene prevoza ili su im dobavljači podigli cijene; ulje, poskupilo sa strane svih rafinerija i trenutna nabavna cijena je iznad prodajne cijene na 05.03.2020.godine). Također distributeri nisu u mogućnosti zadržati postojeću cijenu imajući u vidu da je većina uvoznih programa gdje su proizvođači diljem Evrope podigli cijene; veleprodaje (ViP – nabavke iz zamalja diljem Evrope i povećane cijene, troškovi transporta i sl. jer se teško iznalaze prevoznici).

Imajući u vidu navedeno iz Udruženja ističu da će predmetna odluka prouzrokovati nestašicu dijela proizvoda. Broj takvih proizvoda će se povećavati iz dana i dan. Razlog za to je činjenica da su nabavne cijene za veliki broj proizvoda porasle u periodu od 5. marta do danas zbog čega dobavljači ove robe neće snadbijevati trgovinske lance ispod svoje nabavne cijene. Većina prehrambenih proizvoda se uvozi, a domaći proizvođači uvoze repromaterijal za proizvodnju. U skladu sa tim opravdano je očekivati da će se povećavati nabavne i proizvodne cijene za sve više artikala. To će za posljedicu imati da veliki broj artikala neće biti dostupan za nabavku u trgovinskim lancima, te da će se desiti ozbiljni poremećaji u ponudi prema krajnjim kupcima.

S ciljem prevazilaženja navedenog problema, Udruženje predlaže da se odluka izmijeni u smislu zamrzavanje cijena uz obavezno definisanje "osim u slučaju povećanja cijena sa strane proizvođača, dobavljača ili uvoznik".

Također, imajući u vidu da svi trgovci u maloprodaji svaki dan imaju po nekoliko tipova i vrsta akcija, rasprodaje, promotivne cijene i nekoliko hiljada artikala na raznim akcijama, na dan 05.03.2020. imali su brojne artikle po navedenim cijenama. U cilju

sprječavanja mogućnosti različitog tumačenja Odluke neophodno je definisati i ovo pitanje.

U tom smislu Udruženje predlaže da se definiše da se „zamrzavanje cijena“ ne odnosi na akcijske cijene, rasprodaju i druge cijene proizvoda koji su na dan 05.03.2020.godine imali nižu cijenu od cijene ostvarene u redovnoj prodaji.



Također, član IV Odluke je neprecizan i nejasan i ostavlja prostora za individualno tumačenje

od strane pojedinih inspektora da li se „zamrzavanje cijena“ odnosi na akcijske cijene, rasprodaju i druge cijene proizvoda koji su na dan 05.03.2020.godine imali nižu cijenu od cijene ostvarene u redovnoj prodaji.

Bez obzira na činjenicu da postoje Uputstva od strane Ministarstva trgovine FBiH da se Odluka ne primjenjuje na akcijske, promotivne, cijene rasprodaje i druge cijene koje su na dan 05.03.2020. godine imale nižu cijenu od cijene koja je u redovnom prometu, pojedini inspektori prilikom nadzora različito tumače Odluku i izriču prekršajne naloge.

U tom smislu Udruženje predlaže da se definiše da se „zamrzavanje cijena“ ne odnosi na akcijske cijene, rasprodaju i druge cijene proizvoda koji su na dan 05.03.2020.godine imali nižu cijenu od cijene ostvarene u redovnoj prodaji.

UPFBiH insistira: Nadležne institucije BiH da hitno interveniraju u Hrvatskoj i Briselu kako bi se ubrzao robni transport prema Evropskoj uniji


Udruženje poslodavaca Federacije Bosne i Hercegovine zahtijeva hitnu intervenciju Predsjedništva Bosne i Hercegovine, Vijeća ministara BiH, Ministarstva vanjskih poslova BiH, svih kriznih štabova prema nadležnim organima Republike Hrvatske i Evropske unije kako bi se otvorio veći broj graničnih prijelaza prema ovoj državi za robni transport, kao i da se ubrza prelazak preko graničnih prijelaza, odrede rute prolaska



robnog transporta te mjesta za pauze za odmor i tankovanje goriva, što su već primjenjuje u većini evropskih zemalja.


„U protekla dva dana UPFBiH je dobilo više desetina pritužbi naših članica koje se bave transportom, ali i drugih, o problemima

koje imaju sa graničnim prijelazima prema Hrvatskoj koji su određeni za robni transport, ogromnim, kilometarskim zastojećima na graničnim prijelazima Gradiška i Šamac. Prema informacijama kojima raspolažemo, problem je nastao kada su u Republici Hrvatskoj uveli tzv. konvoje. Vozači s kamionima na ulaz u Hrvatsku čekaju i više od tri dana, a kada uđu na teritorij Hrvatske, opet čekaju na formiranje konvoja za tranzit kroz Hrvatsku. Sve vrijeme moraju biti u kamionu i nemaju osnovne uvjete za normalan život, a posebno je problem što nema postavljenih mokrih čvorova. Neki od



njih su sve to vrijeme na mostu pa su u potpunosti blokirani. Prema tvrdnjama vozača, zadržavani su u nehigijenskim uslovima, bez ikakvih objašnjenja. Imali su strogu zabranu napuštanja vozila, a za svaki pokušaj napuštanja vozila im je prijećeno kaznama", ističu iz UPFBiH.

Također navode da iz bh. transportnih kompanija koje obavljaju usluge prijevoza po cijeloj Evropi naglašavaju da se u ostatku Evrope transport vrši uz male ili nikakve zastoje.




„Vozila koja idu prema Sloveniji, Italiji i zapadnom dijelu Evrope idu na GP Gradiška, dok vozila koja idu prema Mađarskoj, Poljskoj itd. moraju ići na GP Šamac. Radi se o odluci nadležnih institucija Hrvatske o kojoj niko u BiH nije zvanično obaviješten, tako su mnogi prijevoznici koji nisu raspolagali ovom informacijom, imali dodatne troškove preusmjerenja vozila sa jednog na drugi graničnih prijelaz", kažu iz UPFBiH.

Zbog svega navednog, pojedini prijevoznici koji su uspjeli, vratili su kamione u BiH i čekaju da se ovaj problem riješi. Ukoliko se ne riješi, ističu prijevoznici, razmišljaju da u potpunosti prestanu nuditi usluge prijevoza, zatvore firme i otpuste vozače.

Zbog svega navedenog iz UPFBiH apeluju od nadležnih bh. institucija da se što prije riješi problem otvaranja dodatnih graničnih prijelaza za robni promet prema Hrvatskoj i maksimalno ubrza prolazak kamiona preko graničnih prijelaza Gradiška i Šamac, uz maksimalno poštivanje svih mjera zaštite koje su na snazi u Hrvatskoj i BiH.

UPFBiH na web stranici pokrenulo servis „Koronavirus- informacije za poslodavce“



Udruženje poslodavaca Bosne i Hercegovine od četvrtka 19. marta 2020. godine na web stranici UPFBiH ([LINK](#)) uvelo servis za poslodavce na kojem kontinuirano objavljuje aktuelne informacije, odluke i upute nadležnih institucija na nivou države Bosne i

Hercegovine, entiteta, kantona i Brčko distrikta BiH u vezi sa aktuelnom situacijom sa pandemijom koronavirusa, koje se objavljuju svakih sat vremena, u periodu od 08:00-17:00 sati, svakoga dana. Na servisu svi mogu dobiti zvanične informacije iz institucija vlasti na državnom, entitetskim, kantonalnim nivoima, te drugih organa koji su vezani za novonastalu situaciju.

„Na ovaj način želimo pomoći našim članicama, ali i svima drugima da pravovremeno, na jednom mjestu dobiju kvalitetne i tačne informacije o naredbama, odlukama, uputstvima i aktuelnim informacijama zvaničnih institucija u vezi sa pandemijom koronavirusa. Želimo pomoći poslodavcima, ali i građanima da pravovremeno budu informirani pouzdanim informacijama koje im mogu pomoći u organiziranju poslovnih procesa, odvijanju procesa rada i svakodnevnih aktivnosti", kažu u UPFBiH.

Osim objave vijesti na web stranici UPFBiH, svim članicama Udruženja poslodavaca FBiH se dva puta dnevno šalju servisne informacije putem e-maila, kako bi bili informirani o svim aktuelnostima vezanim za pandemiju koronavirusa i mjere koje se poduzimaju u Bosni i Hercegovini.

Pregled članova Zakona o radu FBiH, Zakona o vijeću uposlenika FBiH i kolektivnih ugovora

Na traženje većeg broja članica, Udruženje poslodavaca FBiH je sačinilo pregled članova Zakona o radu FBiH, Zakona o vijeću uposlenika FBiH i kolektivnih ugovora o pravima i obavezama poslodavaca, koji definišu godišnji odmor, nakandu plaća, otkaz i otpremninu.



[Zakon o radu FBiH](#)

[Kolektivni ugovori](#)

[Zakon o vijeću uposlenika FBiH](#)

Održana sjednica Gupacije poslodavaca USK pri UPFBiH o situaciji u ekonomiji usljed pandemije koronavirusa



Na sjednici Upravnog odbora Grupacije poslodavaca USK pri Udruženju poslodavaca FBiH, održanoj 20. marta 2020. godine, osim članova UO prisustvovali su i članovi i zamjenici članova Ekonomsko-socijalnog vijeća USK i ministar privrede USK



Nijaz Kadirić.

Prisutni su raspravljali o aktuelnoj situaciji i posljedicama po ekonomiju koje su već uveliko primjetne usljed pandemije koronavirusa. Grupacija poslodavac USK pri UPFBiH već je aktivno uključena u detektiranje i rješavanje nastalih problema te kroz svoje aktivnosti i u saradnji sa resornim ministarstvima pokušavaju iznaći rješenja.

Na sjednici je zaključeno da će Grupacija do ponedjeljka 23. marta dostaviti set mjera koje će pomoći ublažavanju ekonomskih posljedica, kao što je osnivanje Fonda pomoći za koji je Vlada već donijela odluku da se ova stavka uvrsti u Budžet.

Grupacija poslodavaca USK pri UPFBiH traži formiranje fonda pomoći privredi i definisanje kategorije ugroženosti radnih mjesta i poslodavaca

Imajući u vidu trenutno stanje u privrdi, uzrokovano pandemijom koronavirusa, Grupacija poslodavaca USK pri Udruženju poslodavaca FBiH utvrdila je prijedlog mjera za pomoć privredi, odnosno poslodavcima i radnicima u realnom sektoru. Prijedlog mjera je dostavljen premijeru Vlade USK Mustafi Ružiću.

- 1. Formirati fond za pomoć privredi**, sa inicijalnim sredstvima u iznosu od jedan posto ovogodišnjeg budžeta kantona. Očekuje se da će u ovaj fond sredstva uplatiti i viši nivoi flasti, ali i međunarodne institucije. Na sredstva iz fonda, na osnovu kriterija koje bi dogovorili socijalni partneri, imale bi pravo kompanije koje ne otpuste radnike.
- 2. Definirati kategorije ugroženosti radnih mjesta i poslodavaca** tako da prvu kategoriju radnih mjesta čine ona koja su trenutno izvan pogona. Kao drugu kategoriju definirati sva ostala preduzeća u USK jer svi posredno ili neposredno osještaju posljedice ove krize, s obzirom da je došlo do smanjenja potražnje roba i usluga.

Gruacija poslodavaca SBK pri UPFBiH podržava mjere Udruženja za prevazilaženje krize

Na sjednici UO Grupacije poslodavaca SBK pri UPFBiH, održanoj 16. marta 2020. godine, članovi su raspravljali o situaciji u privredi uslijed pandemije koronavirusa.

Članovi su naglasili da je stanje u privredi alarmantno, naročito u sektorima transporta, turizma, ugostiteljstva, drvne i tekstilne industrije, te da su veliki finansijski gubici zbog blokade transporta, nemogućnosti izvoza gotovih proizvoda i uvoza repromaterijala, vraćanja uposlenika koji su izvodili građevinske i montažerske radove u zemljama EU. Mnogi ugovori su već danima zaleđeni, a primjetan je i porast otkazivanja ugovorenih isporuka i izvođenja građevinskih radova u EU.

Grupacija poslodavaca SBK pri UPFBiH podržava aktivnost koju vodi Udruženje poslodavaca FBiH sa drugim subjektima na nivou FBiH i države BiH, a tiče se mjera za pomoć privredi, između ostalog i prijedloga za formiranje Kompenzacijskog fonda na nivou Federacije BiH u cilju pomoći privrednim subjektima koji su pogođeni posljedicama korona virusa, te prolongiranje uplate poreza na dobit za 2019. godinu na neodređeno vrijeme.

Upravni odbor je predložio da se odmah donese mjera kako bi se odložilo plaćanje poreza i doprinosa na razuman period, te da se plaćanje PDV da se pomjeri sa sedam dana na minimalno 30 dana. Članovi inistiraju da Vlada SBK, Vlada FBiH i UP FBiH sa bankarskim sektorom odmah dogovori i omogući da se svi krediti koje koriste privredni subjekti, kao i uposlenici (građani) zalede na tri mjeseca, te da se iz Kompenzacionog fonda, na teret dobiti banaka, subvencionira plaćanje kamate minimalno šest mjeseci. Insistiraju da se, u interesu uposlenika, iznađe dio sredstava za subvencioniranje plaćanja doprinosa i poreza na plaće, što će doprinijeti da se sačuvaju radna mjesta uposlenika, kao i da se neodložno pristupi rješavanju problema sektora transporta (uvoz-izvoz) i obezbijedi telefonska linija kako bi se mogle dobiti najosnovnije informacije u vezi prolaznosti granica.

Grupacija poslodavaca SBK pri UPFBiH uputila prijedlog seta mjera za ublažavanje ekonomskih posljedica

Upravni odbor Grupacije poslodavaca SBK pri UPFBiH uputio je ministru prirede SBK Nisvetu Hrnjiću, a koji obavlja i funkciju predsjednika Kriznog štaba pri Ministarstvu privrede SBK, prijedlog seta mjera za pomoć privredi.

U dopisu se navodi da pandemija koronavirusa već ostavlja teške ekonomske posljedice, te da je proizvodnja u nekim kompanijama potpuno obustavljena ili značajno smanjena, a da je repromaterijala, posebno onog koji se uvozi, skoro ponestalo. Poseban problem predstavlja transport, jer kamioni na granici čekaju do pet dana, te stoga kupci u inozemstvu odlažu prijem roba i proizvoda koje su ugovorili sa bh. firmama. Kompanije su primorane jedan broj radnika poslati na godišnje odmore, dok je jedan broj radnika u izolaciji.

Grupacija poslodavaca SBK pri UPFBiH, kako ne bi došlo do mnogo većih posljedica i kako bi se negativni trend usporio, predložila je Kriznom stabu i Vladi SBK da se **odmah pristupi formiranju kantonalnog fonda za pomoć privrednim društvima** koja trpe zbog novonastale situacije.



Predloženo je da se razmotri da sredstva u fondu Zavoda za zapošljavanje, eventualne grantove za bilo koje namjene, sredstva namijenjena za kulturu, sport,

održavanju puteva, kao i općinska sredstva za različite namjene, a u ovom momentu su sekundarne usmjere za podršku proizvodnim firmama.

Članovi UO smatraju da bi hitno, u koordinaciji sa federalnim i državnim nivoima vlasti, donijeti mjere koje uključuju:

- subvencioniranje doprinosa i poreza na plate**
- subvencioniranje dijela plaća**
- hitno smanjenje doprinosa i poreza na plate**
- smanjenje cijena električne energije,**
- odgodu plaćanja električne energije na minimalno 30 dana,**
- odgodu plaćanja PDV-a na minimalno 30 dana,**
- odgodu plaćanja trupaca, uglja i ostalih domaćih resursa kojima upravljaju javna preduzeća na rok do 60 dana,**
- odmah ukinuti plaćanja određenih такси i nameta**

U dopisu se također navodi da Grupacija poslodavaca SBK pri UPFBiH neumorno sugerira da se radnici ne otpuštaju, te da, izuzev pojedinačnih slučajeva, do toga nije dolazilo, već da poslodavci imaju veliko razumijevanje za svoje zaposlenike, odnosno, insistiraju dosljednom provođenju mjera koje propisuju državni organi i osiguravaju dovoljno sredstava za preventivnu zaštitu zdravlja.

Udruženje poslodavaca KS zahtjeva donošenje hitnih mjera za smanjenje posljedica na privredu KS



Nakon vanredne sjednice Vlade Kantona Sarajevo, održane 17.03.2020 godine, kojoj su prisustvovali predstavnici Udruženja poslodavaca KS, održana je i Vanredna sjednica Upravnog odbora UP KS na kojoj su donijeti slijedeći zaključci:

1. Udruženje poslodavaca KS izražava zadovoljstvo činjenicom da je Vlada KS iskazala spremnost da pokrene hitne aktivnosti na realizaciji, sa naše strane, predloženih mjera za ublažavanje negativnih posljedica izazvanih korona virusa;
2. Podržavaju se aktivnosti Vlade KS na uspostavi Kriznog štaba za poduzimanje mjera kojima bi se ublažile posljedice u poslovanju privrednih subjekata određenih djelatnosti;
3. Očekuje se od Vlade KS da svojom odlukom u Krizni štab uvrsti i pet predstavnika Udruženja poslodavaca koji će dati maksimalan doprinos u predlaganju mjera koje mogu dati konkretne rezultate;
4. Sve predložene mjere, prevashodno, moraju biti u funkciji očuvanja radnih mjesta i zadržavanje uposlenika, te spriječavanja bankrota i zatvaranja firmi u Kantonu

Sarajevo.

Također, Upravni odbor UPKS analizirao je ranije dostavljene prijedloge mjera te izvršio dopunu istih. Prijedlozi hitnih mjera UPKS su slijedeći:

1. Donijeti odluku o zatvaranju objekata i proizvodnih pogona u kojima se, u jednom trenutku, nalazi ili radi više od 250 radnika;
2. Donijeti odluku o uspostavi Fonda za pomoć privrednim subjektima, odnosno radnicima kojima su ugrožena radna mjesta i koji su najviše pogođeni koronavirusom (hotelijerstvo, prijevoz putnika, ugostiteljstvo....). Iz ovoga fonda trebaju se prevashodno pokriti doprinosi i porezi kao i dio plate radnicima koji se nalaze na prinudnom odmoru i nisu radno angažirani;
3. Zajedno sa drugim nivoima vlasti u BiH preuzeti obavezu za pokriće plaća uposlenicima koje prijevremeno ostaju bez posla – minimalnu plaću sa doprinosima;
4. Utvrditi kriterije po kojima neki privredni subjekt može aplicirati za sredstva iz Fonda za pomoć privrednim subjektima;
5. Donijeti odluku da se, privremeno, poslodavci oslobode plaćanja bilo kakvih parafiskalnih nameta;
6. Obustaviti bilo kakve pregovore o kolektivnim pravima uposlenika i poslodavaca, kao i bilo kakvim dodatnim opterećenjima budžeta KS;
7. Planirana finansijska sredstva za investicije koje nemaju tretman hitnosti usmjeriti u fond za podršku ugroženim privrednim subjektima i njihovim uposlenicima;
8. Hitno angažirati Robne rezerve i obezbjediti dezinfikaciona sredstva, maske i zaštitnu opremu za uposlenike i putnike u javnom prijevozu KS;
9. U vrijeme trajanja "vremena nesreće", obustaviti bilo kakvo novo zapošljavanje;
10. Donijeti odluku da uposlenici tzv. javnog sektora mora dijeli sudbinu uposlenika u tzv. realnom sektoru, odnosno biti solidarni i pomoći u finansijskoj pomoći onima koji, zbog koronavirusa, privremeno ostanu bez posla.


Uzimajući u obzir da određeni sektori su iznimnog značaja za život građana Kantona Sarajevo, dostavljamo i prijedloge trgovinskog sektora:

1. Zamrzavanje cijena na 05.03.2020.godine – daleko je bolje rješenje zamrzavanje marži, kako proizvođačkih, distributerskih, veleprodajnih i maloprodajnih nego ograničenja cijena. Naša bi preporuka bila da se ubuduće radi o daleko kvalitetnijoj mjeri. Veliki je broj artikala i sirovina iz uvoza gdje niko od nas ne može uticati na kretanje istih. Međutim, ako ne idemo u tom pravcu, saglasni smo sa Odlukom o zamrzavanju cijena na dan 05.03.2020. s tim da se zamrzavanje odnosi na sve u lancu snabdijevanja – proizvođač, distributer, veleprodaja, maloprodaja. Ujedno, potrebno je naglasiti da se radi o redovnim cijenama a pod okolnostima da je kod svih u maloprodaji na taj, ili bilo koji drugi dan, dobar dio artikala bio u raznim aktivacijama/ akcijama. Ovdje treba razmisliti da li iz Odluke isključiti neke artikle gdje su sirovine uvozne, jer vjerujemo da su cijene išle na gore a jako su bitni, kao što su to naprimjer dezinfekciona;

2. Radno vrijeme – nemamo ništa protiv ograničenja ukoliko se odnosi na sve (kompletno maloprodajno tržište uključno STR-ove) i da se i po tom osnovu rade kontrole i definiraju kazne za kršenje. Kod ograničenja radnog vremena da se razmisli o kontraefektima takve odluke jer skraćenje radnog vremena podrazumijeva veći broj kupaca u objektima a samim time i veću mogućnost potencijalnog prenosa zaraze. S druge strane, ne raspolažemo resursima za kontrolu i sprečavanje broja potrošača u prodajnim prostorima;

3. „Tržni centar“ – da se jasno definiše šta se podrazumijeva pod tržnim centrom te iz odluke obavezno izdvoje „prostori za prodaju robe široke potrošnje“. Naglašavamo da se u svakom tržnom centru nalaze i objekti za palasman robe široke potrošnje te da u većini imaju ili zasebne ulaze ili se trebaju izdvojiti iz odluke a ako treba označiti koridori (trake i sl.). Ujedno, sugerišemo da se Odluka proširi u definiciji i na specijalizirane trgovine sa dodacima prehrani, prehrambenim i higijenskim artiklima (dm, cm i slično). Ukoliko se specijalizirane prodavnice nalaze u tržnim centrima i nemaju direktan ulaz, potrebno je osigurati i označiti koridor-prolaz do ulaza/izlaza specijalizirane prodavnice;

4. Nužna dezinfekcija – Imajući u vidu da je naloženo svim privrednim subjektima da




vrše dezinfekciju svojih poslovnih prostora što stvara velike dodatne troškove privrednim subjektima, a naročito onima koji se bave prodajom roba široke potrošnje predlažemo da Kanton Sarajevo snosi ili sufinansira troškove obavezne dezinfekcije ili da donira sredstva za dezinfekciju.

Udruženja poslodavaca Kantona Sarajevo traži od Kriznog štaba, Vlade kao i Skupštine Kantona Sarajevo podršku i da prema nadležnim organima FBiH i države Bosne i Hercegovine dostavi:

- inicijativu Udruženja poslodavaca da se, na period od najmanje 90 dana, odgodi plaćanje kreditnih obaveza poslodavaca i uposlenika u sektorima pogođenim korona virusom;
- prijedlog Udruženja poslodavaca FBiH o odgodi plaćanja direktnih i indirektnih poreza na period od minimalno 90 dana;
- Vlada FbiH treba pokrenuti proceduru pregovora sa međunarodnim donatorima, finaciskim organizaicijama (UNDP, EBRD; World bank, MMF) za podršku pomoći očuvanja radnih mjesta kroz grantove i druge oblike finacijske pomoći koji će poslužiti kao prva pomoć privredi za otklananjaj posljedica izazvanih posljedicama pandemije koronavirusa.

Udruženje poslodavaca KS predložilo set mjera za ublažavanje ekonomskih posljedica pandemije koronavirusa

Nakon vanredne sjednice Vlade KS, održane 17.03.2020 godine, na kojoj su predstavnici Udruženja poslodavaca KS izrazili zabrinutost zbog epidemije koronavirusa i nesagledivih posljedica koje će snositi privredni subjekti u Kantonu Sarajevo, Udruženje poslodavaca Kantona Sarajevo iskazuje svoju



punu spremnost za pružanje pomoći nadležnim organima u Kantonu Sarajevo za iznalaženje rješenja i donošenje hitnih mjera kako bi se smanjili negativni efekti koji će dovesti do značajnog smanjenja likvidnosti privrednih subjekata i ugrožavanja velikog broja radnih mjesta.

U tom cilju, Udruženje poslodavaca je 18.03.2020. predložilo sljedeće mjere:

1. **Uspostavljanje i osiguravanje nesmetanog transporta roba**, ugovaranje nabavke osnovnih životnih potrepština i povećanje robnih rezervi u cilju smanjenja panike u društvu;
2. **Suspenzija različitih poreza i parafiskalnih nameta** na period trajanja vanrednog stanja uz pripremu mjera kojima bi se taj teret što bolje rasporedio poslije normalizacije stanja;
3. **Interventno pomoći proizvođačima sredstava za dezinfekciju** da povećaju proizvodnju;
4. **Primjena jednakih mjera i standarda u prevazilaženju posljedica krize kada su u pitanju statusi i primanja radnika u javnom i privatnom sektoru** u vremenu trajanja krize.

Grupacija poslodavaca ZDK pri UPFBiH predložila set mjera za ublažavanje ekonomskih posljedica



Imajući u vidu stanje u privredi i društvu u cjelini kao posljedicu pandemije korona virusa, Grupacija poslodavaca Zeničko-dobojskog kantona pri Udruženju poslodavaca FBiH je utvrdila prijedlog mjera za pomoć poslodavcima i radnicima u realnom sektoru.

- 1. Formirati fond za pomoć privredi**, sa inicijalnim sredstvima u iznosu od jedan posto ovogišnjeg budžeta kantona. Očekujemo da će u ovaj fond sredstva uplatiti i viši nivoi vlasti kao i brojne međunarodne finansijske institucije. Na sredstva iz fonda, po određenim kriterijima koje bi dogovorili socijalni partneri, imale bi pravo one firme koje ne otpuste radnike i ulože vlastita sredstava za zaštitu radnih mjesta i sredstva za prevenciju od pandemije. Sredstva bi se koristila isključivo za očuvanje zaposlenosti, neto plaće, doprinose i sredstva zaštite. Pod posebnim uslovima sredstva bi se mogla koristiti i za saniranje štete nastale kao posledica mjera državnih organa u prevenciji korona virusa. Prioritetno sredstva bi trebalo koristiti za isplatu doprinosa uposlenicima i to za mjesec mart, april i maj. Poslodavci bi uplatili 80 posto neto plaća uposlenicima za te mjesec. Sve to pod uslovom da nema otpuštanja radnika. Ta bi sredstva išla samo za plaće onih radnika koji ne rade. Pravilnik za raspodjelu sredstava iz fonda treba da usaglase socijalni partneri, Vlada, poslodavci i sindikati.
- 2. Uvesti moratorij za sva parafiskalna davanja** koji su izvorni prihodi Kantona.
- 3. Pomoći poljoprivrednicima za proljetnu sjetvu.**

Košarac: Ukoliko bude potrebno zabranit ćemo izvoz određenih roba



Ministar vanjske trgovine i ekonomskih odnosa BiH Staša Košarac održao je 16.03.2020. godine sastanak s predstavnicima Udruženja poslodavaca FBiH, Vanjskotrgovinske komore BiH, Privredne komore RS, Privredne komore FBiH, Privredne komore Brčko Distrikta te Unije udruženja poslodavaca RS, povodom uticaja koronavirusa na ekonomiju. Ispred Udruženja poslodavaca FBiH sastanku je prisustvovao direktor Mladen Pandurević i član UO Safudin Čengić.

"Ono što je potpuno jasno, a na osnovu analiza u okviru kojih je anketirano 250 preduzeća, najveće posljedice već izražaju prerađivačke kompanije, transportne, odnosno mala i srednja preduzeća i svakako turizam. Već oko 850.000 noćenja je otkazano u turističkim kapacitetima. Svjesni smo činjenice da ćemo pored ovih dnevnih problema imati velike izražene posljedice po privredu BiH. Tražit ćemo rješenja, ovo je postupak koji će trajati dugo", rekao je Košarac.

Istakao je kako su na sastanku razgovarali o tome na koji način pomoći privredi kada su u pitanju uplata poreza i doprinosa, uplata poreza na dobit.

Privreda trpi zbog zastoja rada Komisije za vrijednosne papire FBiH




Udruženje poslodavaca Federacije BiH uputilo je dopis federalnim institucijama u kojem traži da se urgentno riješi pitanje rada Komisije za vrijednosne papire FBiH.

Uvažavajući ozbiljnost situacije u kojoj se, zbog nefunkcionisanja Komisije nalaze investitori, dionička društva i dioničari u FBiH, a kojima se svakodnevno nanosi nemjerljiva šteta, iz UPFBiH zahtijevaju da se odmah iznađe rješenje za uspostavljanje funkcionalnosti Komisije i rješavanje dostavljenih predmeta.

– Trenutni zastoj u radu Komisije zatekao je privredne subjekte, u trenutku kada trebaju ili su već podnijeli zahtjeve za postupanje Komisije iz njene zakonom utvrđene nadležnosti, a po kojima je trenutno rješavanje do daljnjeg obustavljeno, čime se uzrokuje višemilionska šteta privrednim subjektima, a naročito investitorima čija su ulaganja na čekanju – navode iz Udruženja.

Takođe, ovakav status trenutno utiče i na nemogućnost dokapitalizacije privrednih




društava, čime se investitori spriječavaju da svojim sredstvima izvrše kapitalno jačanje društava koja posluju u Federaciji BiH.

– Podsjećamo Vas da privredna društva u FBiH kroz uplate direktnih/indirektnih poreza, doprinosa, taksi i naknada koje uplaćuju u budžet Federacije i BiH direktno utječu na ekonomski napredak BiH, te upozoravamo na posljedice koje su zbog neočekivanog i iznenađenog zastoja u radu Komisije dovele do smanjanja prihoda, reputacijskog rizika privrednih društava i propuštene dobiti u protekla tri mjeseca – navodi se u dopisu Udruženja.

Poslodavci posebno ističu da Komisija više od tri mjeseca ne obavlja svoju primarnu i zakonom definiranu funkciju, a to je zaštita investitora i nadzor tržišta i učesnika na tržištu, te nadzor emisije i prometa vrijednosnih papira, čime rizikuje nastanak materijalne štete privredi, bankama, dioničkim društvima, dioničarima i investitorima.

– Imajući u vidu naprijed izneseno a u cilju prevazilaženja trenutne situacije, zahtjevamo da bez odlaganja i po hitnom postupku pristupite rješavanju navedenog pitanja, uvažavajući značaj koji ima za privredu, te pronađete rješenje kojim će se osigurati nastavak rada Komisije i time zaustaviti dalje nanošenje štete privredi.

Želimo još jednom upozoriti da je privrednom sektoru ovakvo neodgovorno ponašanje predstavnika vlasti do sada nanijelo materijalnu štetu koju će biti teško nadoknaditi, te da će ukoliko se ne riješi ovo pitanje biti primorani da svoja prava i nadoknadu štete traže sudskim putem od odgovornih institucija – navodi se u dopisu UPFBiH koji je upućen na adrese oba doma Parlamenta FBiH, Vlade, predsjednika i potpredsjednika Federacije te same Komisije.



Predstavници UPFBiH i ambasada u BiH o uključivanju UPFBiH u implementaciju nove reformske agende

Predsjednik i direktor Udruženja poslodavaca FBiH Adnan Smailbegović i Mladen Pandurević organizovali su radnu večeru na kojoj su prisustvovali zamjenik ambasadora Delegacije EU u BiH Khaldoun Sinno, britanski ambasador u BiH Matthew Field, njemačka ambasadorica u BiH Margret Uebber i šef Ekonomskog odjela Ambasade SAD-a u BiH Eric Camus.

Sastanku su prisustvovali i predsjednik i direktor Unije udruženja poslodavaca RS-a Saša Trivić i Saša Ačić.

Prisutni su razgovarali o uključivanju Udruženja poslodavaca FBiH u implementaciju reformske agenda "Zajedničke socioekonomske reforme za period 2019-2020. godine".

Predstavnici Udruženja poslodavaca FBiH su istakli da Udruženje želi preuzeti svoj dio tereta i dati dopinos u procesu poboljšanja trenutnog ekonomskog stanja u BiH, kroz implementaciju pomenute agende čiji je cilj održiv i ubrzan ekonomski rast, veća konkurentnost privatnog sektora i bolje poslovno okruženje.

Analizom ciljeva implementacije „Zajedničke socioekonomske reforme za period 2019-2022. godine" i ciljeva "Inicijative „20+5+6", koju je pripremila Udruženje, zaključeno je da su oni u velikoj mjeri komplementarni, te da bi efikasna implementacija reformske agende po automatizmu značila i implementaciju inicijative Udruženja, kazali su iz Udruženja.

Predstavnici ambasada u BiH pozdravili su opredjeljenost Udruženja za preuzimanje proaktivne uloge u rješavanju gorućih problema u bh. privredi.

Poslodavci očekuju od Vlade FBiH da prestane pričati o reformama, nego da ih hitno provode



Poslodavci očekuju od Vlade Federacije Bosne i Hercegovine, kao izvršne, ali i predstavnika zakonodavne vlasti u FBiH da prestanu pričati o neophodnosti provođenja reformi i da se što hitnije krene u provedbu reformi, istaknuto je tokom sastanka predstavnika Grupacije poslodavaca Tuzlanskog kantona pri Udruženju poslodavaca Federacije Bosne i Hercegovine sa federalnim premijerom Fadilom Novalićem, održanom 06. marta 2020. godine.

Sastanak je organiziran na inicijativu Udruženja poslodavaca FBiH, a ispred UPFBiH prisustvovali su mu predsjednik Adnan Smailbegović i direktor Mladen Pandurević.

Vlada Federacije Bosne i Hercegovine nužno mora ubrzati aktivnosti na donošenju reformskih zakona s ciljem rasterećenja privrede i poboljšanja poslovnog ambijenta, naročito imajući na umu aktuelna negativna kretanja na svjetskom ekonomskom tržištu, čije posljedice itekako osjećaju privrednici u Federaciji Bosne i Hercegovine.


Tokom sastanka je naglašena potreba što hitnijeg usvajanja zakonskih prijedloga koje su predložili poslodavci u okviru „Inicijative 20+5+6“, a naročito seta poreskih zakona koji se tiču



prijedloga zakona o doprinosima, porezu na dohodak te porezu na dobit, koji za cilj imaju smanjenje opterećenja na rad.

Kao jednu od hitnih mjera koju nužno treba provesti, poslodavci su ponovo naglasili formiranje Koordinacionog tima za parafiskalne namete u FBiH s ciljem ukidanja ili smanjenja postojećih parafiskalnih nameta, kao i kontrole donošenja novih parafiskalnih nameta koji opterećuju poslovanje kompanija.

„Očekujemo da Vlada Federacije Bosne i Hercegovine poduzme hitne mjere kako bi se ublažili negativni efekti posljedica po privredu u FBiH, izazvanih epidemijom coronavirusa i migrantskom krizom. Pojedine naše članice već imaju problema u nabavci i plasmanu roba što je direktna posljedica epidemije. Premijeru smo naglasili da Vlada Federacije BiH mora hitno intervenirati kako bi se spriječile krizne situacije“, naglasili su iz Udruženja poslodavaca FBiH.



UPFBiH za svoje članice organizovao edukaciju o dostavljanju podataka iz knjigovodstvenih evidencija elektronskim putem

Nakon održanih radionica u Širokom Brijegu i Tuzli, Udruženje poslodavaca FBiH je u saradnji sa Upravom za indirektno oporezivanje BiH organizovalo u Zenici 03. marta 2020. godine besplatnu edukaciju za članice „Uputstvo o dostavljanju podataka iz knjigovodstvenih evidencija elektronskim putem“.

Uputstvom se određuje postupak dostavljanja podataka, ko može da dostavi podatke, rokovi za dostavljanje podataka, kao i prava i obaveze obaveznika indirektnih poreza i Uprave za indirektno oporezivanje u vezi sa dostavljanjem podataka iz knjigovodstvenih evidencija elektronskim putem, a ciljem edukacije je da se u praksi obezbijedi pravilna primjena Uputstva, te poslodavcima daju pojašnjenja primjene pojedinih odredaba navedenog Uputstva.

Edukaciju je vodio šef grupe za podršku RC Tuzla Uprave za indirektno oporezivanje u BiH Jozo Piljić, a prisustvovali su joj oko 30 predstvanika kompanija sa područje Zeničko-dobojskog i Srednjobosanskog kantona. Na edukaciji se govorilo o prilagođavanju postojećih sistema za elektronsko dostavljanje podataka, o licima ovlaštenim za dostavljanje elektronskih evidencija, načinu i formatu dostavljanja elektronske evidencije, šta je i kako se pravi CSV format i o početku obavezne dostave elektronske evidencije.

Po završetku izlaganja, postavljeno je pitanje zašto Porezna inspekcija pri kontroli PDV-a traži podatke iz prihoda, a ne iz KIF-a, te je savjetovano da kompanije insistiraju da to bude po KIF-u ili KUF-u, a nikako po prihodima i KIF-u, jer te dvije stavke nikada nisu isto.

U Bihaću održana radionica o dostavljanju knjigovodstvenih podataka elektronskim putem



U Bihaću je UPFBiH u saradnji sa Upravom za indirektno oporezivanje BiH 10. marta održalo besplatnu radionicu za članice na temu „Uputstvo o dostavljanju podataka iz knjigovodstvenih evidencija elektronskim putem“.

U 2020. godini, svi obaveznici koji su u sistemu PDV-a u BiH, imat će mogućnost da prilagode svoje informacione sisteme za elektronsko dostavljanje evidencija o nabavkama (KUF) i evidencija o isporukama (KIF), na elektronski portal UIO BiH, u cilju bržeg i efikasnijeg komuniciranja, te smanjenja troškova poslovanja. Edukaciju je vodio šef grupe za podršku RC Tuzla Uprave za indirektno oporezivanje u BiH Jozo Piljić.

Nakon prezentacije, poslodavci su upitali da li Uprava ima opciju kako olakšati podnošenje podataka manjim poreskim obaveznicima, odnosno onima koji sami vode računovodstvo. Piljić naglašava da ova opcija još uvijek ne postoji, ali da bi bila dobra ideja uvesti program smišljen za olakšavanje i ovakve vrste podnošenja knjigovodstvenih evidencija.

Nova članica UPFBiH - Interkomerc d.o.o



Interkomerc d.o.o je osnovan 1985. godine. Kompanija je locirana u poslovnoj zoni Rodoč, a upošljava oko 200 radnika. Proizvodi koje nude tržištu su odljevci do deset kilograma različitih dimenzija i oblika, a karakterizira ih vrlo

glatka i čista površina, izuzev posebnih slučajeva kada je potrebna dorada, a takvi se mogu koristiti u područjima koji imaju iznimno visoke sigurnosne standarde kao npr. autoindustrija, građevinska, elektro, plinska, rasvjetna i gas industrija...

Više o kompaniji na [oficijelnoj stranici](#).

Nova članica UPFBiH - M.A.L. Grizelj

Preduzeće M.A.L. GRIZELJ osnovano je 2000. godine te je do danas postalo jedno od najvećih trgovačkih centara na području Hercegovine. Izuzetno široka ponuda artikala po povoljnim cijenama, izvrsna lokacija s velikim parkingom, ljubazno osoblje, čine ovaj prodajni centar pravim izborom za kupce. Osnovnu djelatnost M.A.L. GRIZELJ d.o.o. obavlja u novootvorenom Prodajnom centru d.o.o. na lokaciji Dubrava u Sovićima.



Više o kompaniji na [oficijelnoj stranici](#).



UDRUŽENJE POSLODAVACA

UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba